

ELPIIC 2013

Usaha UMK memperkenalkan Model MyRasch di kalangan penyelidik



KOTA BHARU 26 Oktober - Universiti Malaysia Kelantan (UMK) melalui Pusat Penyelidikan dan Inovasi Keusahawanan Global (GERIC), menganjurkan program 'Evaluation of Learning for Performance Improvement International Postgraduate Colloquium' (ELPIIC 2013) bertempat di Hotel Renaissance, Kota Bharu, Kelantan, pada 25 hingga 26 Februari 2013.

Program ELPIIC 2013 turut mendapat kerjasama 'The Elsevier' iaitu sebuah syarikat penerbitan jurnal terkemuka di dunia yang memberikan maklumat berkenaan produk dan perkhidmatan serta kajian dalam bidang saintifik, teknikal dan perubatan.

Forum selama dua hari itu telah dirasmikan oleh Timbalan Menteri Kewangan, YB. Senator Dato' Dr. Awang Adek bin Hussein, dengan objektif utamanya adalah untuk menjadikan ELPIIC 2013 sebagai landasan terbaik kepada Universiti Malaysia Kelantan untuk terus aktif di dalam penerbitan jurnal di peringkat antarabangsa.



Menurut Dato' Dr. Awang Adek, pembangunan tenaga akademik hendaklah dilaksanakan secara seimbang dengan pencapaian pembangunan negara bagi merealisasikan hasrat kerajaan untuk menjadikan Malaysia menjadi sebuah Negara membangun pada tahun 2020.

Beliau berkata, pada persidangan Forum Ekonomi Dunia, Bank Dunia telah mengiktiraf Malaysia merupakan negara kelima berdaya saing untuk pelaburan dan menjalankan perniagaan.

"Sehubungan itu, kerajaan telah merangka pelbagai aktiviti promosi perdagangan dan perniagaan di peringkat global dan tempatan dengan mengambil bahagian dalam misi pelaburan dan pameran perdagangan atau bahkan dalam industri berkaitan forum, seminar dan persidangan," katanya dalam ucapan sempena perasmian ELPIIC 2013.

Dato' Dr. Awang Adek, berkata, adalah menjadi harapan beliau untuk melihat program ini sebagai platform untuk menyalurkan, berkongsi dan merealisasikan segala idea yang inovatif serta ilmu untuk dipraktikkan bagi mempertingkatkan pencapaian yang sedia ada.

Jelas beliau, kesemua elemen hasil daripada program ini boleh didokumentasikan dan digunakan sebagai rujukan untuk generasi akan datang bagi meningkatkan etika dan amalan dalam kepimpinan.



“Ini secara tidak langsung membawa piawai pengurusan ke tahap yang lebih tinggi untuk memupuk Budaya Kerja Prestasi Tinggi di kalangan pengurus dan pentadbir di semua Institusi Pengajian Tinggi (IPT) di seluruh negara,” jelasnya.

Sementara itu, Naib Canselor UMK, YBhg. Prof. Datuk Dr. Raduan bin Hj. Che Rose, menjelaskan bahawa penganjuran ELPIIC 2013, adalah bertujuan untuk peningkatan prestasi yang berkualiti dalam perkongsian perkembangan bidang penyelidikan yang berkaitan dengan pendidikan tinggi.

Justeru itu, pada ELPIIC 2013, kami amat berbesar hati untuk memperkenalkan model “Rasch Measurement Society Malaysian Chapter (MyRasch)” iaitu sebuah model penyelidikan yang digunapakai diseluruh dunia bagi seperti Amerika Syarikat, United Kingdom, Negara-negara Eropah, Asia Tenggara, Asia Timur, Hong Kong, Taiwan dan Jepun.



“Penggunaan model penyelidikan ini amat popular digunakan oleh penyelidik dan pelajar pasca siswazah di seluruh dunia,” katanya. Pada uaputama bagi program ini akan disampaikan oleh dua tokoh terkenal iaitu Y.Bhg Prof. Trevor Bond (James Cook University, Australia) dan Y.Bhg. Prof. Dr. Mahmoud Almsafir (Pengerusi, Pusat Pemantauan Krisis Ekonomi Arab, Kaherah Mesir).

Sempena program ini turut diadakan “International Postgraduate Colloquium” di mana pelajar Ijazah Sarjana dan Kedoktoran akan membentangkan proses kajian mereka, hasil kajian serta menerima komen daripada peserta dalam dan luar negeri.